



Inatsisartut

Aningaasaqarnermut Akileraartarnermullu

Ataatsimiititaliaq

Finans- og Skatteudvalget

Ulloq/Dato: 30. december 2011

J.nr.: 01.31.06/11-00565

Aningaasaqarnermut Naalakkersuisoq

Aningaasaqarnermut Akileraartarnermullu Ataatsimiititaliap suliaq nr. 01.31.06/11-00565 pillugu pingasunngornermi ulloq 14. december 2011-mi aalajangerneranik Naalakkersuisunut ilisimatitsineq.

2012-imiit 2016-imut nioqqutissanik pilersuineq pillugu KNI A/S-imut kiffartuunneqarnissamik isumaqatigiissutip nutaap akuerineqarnissaa.

Naalakkersuisuut **inassutigaaat,**

2012-imiit 2016-imut nioqqutissanik pilersuineq pillugu KNI A/S-imut kiffartuunneqarnissamik isumaqatigiissut ilanngunneqartoq akuerineqassasoq.

Aningaasaqarnermut Ataatsimiititaliap oqaaseqaatai

Suliami tamatumani nioqqutissanik pilersuineq pillugu KNI A/S-imut kiffartuunneqarnissamik isumaqatigiissummut nutaamut missingusiaq akuerineqassasoq Naalakkersuisut qinnutigaat. Kiffartuunneqarnissamik isumaqatigiissut 2012-mut Aningaasanut Inatsimmi konto pingaarnermi 73.01.14-imi Nioqqutissanik pilersuineq tassungalugu oqaasertaliussani takuneqarsinnaasut iluanni killiliussatigut isumaqatigiinniutigineqarpoq.

Inassutigisamut Aningaasaqarnermut Ataatsimiititaliaq ulloq 14. december 2011-mi ataatsimiinnermi avissaartuuppoq.

Ataatsimiititaliami amerlanerussuteqartut Inuit Ataqtigiinnit, Siumumit aamma Atassummit sinniissuutit kiffartuunneqarnissamik isumaqatigiissummut missingusiaq akuerisinnaanngilaat imalu oqaaseqaateqarlutik:

Amerlanerussuteqartut immikkut ima oqaaseqaateqassapput:

Isumaqtigiissummi nioqqutissat nerisassaangitsut ilaajunnaarsinneqarnerat tulluurtuunngilaq. Nioqqutissat nerisassaangitsut annikitsut arlallit, assersuutigalugu igaffimmi atortut aamma meeqqat atisaat, ulluinnarni nioqqutitut isigisariaqarput, iniminneereernikkut sapaatip akunnerini arlalinni tunniunneqarnissaannut utaqqiinnarneqarsinnaangitsut.

Nunaqarfinni isorliunerusunilu sumiiffinni amerlasuuni nioqqutissat akuttusoorujussuarmik taamaallaat tikittarput, taamaattumik internetsi atorlugu sumiiffinni taakkunani innuttaasut nioqqutissat nerisassaangitsut pisariaqartitatik inniminnernissaannut innersuunneqartarnerat naammaginangilaq.

Aammattaaq piniartoqarfiusuni ukioq kaajallallugu piniarnermut atortussat pisariaqartumik periarfissaasinnaasariaqarput.

Ammasarfiit isumaqatigiisummut atuuttumut sanilliullugu annikillisinneqartorujussuupput, tamatumalu kinguneraa inuit suliffimminnik paarsisariaqartut pissutsit tunngavigalugit ullormut pisiniartarnermikkinnik pinngitsoortinneqassammata.

Kiffartuunneqarnissamik isumaqatigiisummut nutaamut missingiusiap takuneqarsinnaasup nunaqarfanni isorliunerusunilu inuunermut pisariaqartut ima annikillisitsigissavai, taakkunanit nussorneq aqunneqanngitsoq kingunerissallugu, tamannalu illoqarfanni inuuniarnermi ajorsarnermik aqqutissiuussissalluni.

Peqqumaasivinnik aqqissuussineq nutaaq killeqarpallaartoq isumaqarnarpoq.

Ulluinnarni innuttaasunik kiffartuussinerup ajorsinnginnissaa amerlanerussuteqartut ataatsimut kissaatigaat, amerlanerussuteqartullu isumaqarput 2016 sioqqullugu pineqartumi sipaartoqassanngitsoq.

Naggasiullugu amerlanerussuteqartut Naalakkersuisunut apeqquteqarput.

Ataatsimiititaliami ikinnerussuteqartup Demokraatineersup kiffartuunneqarnissamik isumaqatigiisummut missingusiaq taama isikkoqartillugu akuerisinnaavaa oqaatigalugulu innuttaasut nikerarnerat malugisinnaaleriigarput pissutigalugu nunami innuttaasut tamarmik aningaasaqarnikkut tatineqarneq killilerniarlugu ilapittuuteqartariaqarnerat nunap aningaasaqarnikkut siunissaatalu pisariaqartikkaa.

Ikinnerussuteqartut isumaqarput Naalakkersuisut pineqartumi tassani kiffartuunneqarnissamik isumaqatigiisummik isumaqatigiinniuteqarsimanerat nuannaarutissaasoq, tamatumani niuertarfinnik pitsannguutaasumik aqqissuussinikkut kiisalu KNI-p pisiniarfinni tamani nutaanik internetsimut isertarfeqalerneratigut annertunerusumik nioqqutissanik innuttaasut nammineerlutik kissaatigisaannik inniminniinissamut periarfissaqalernikkut innuttaasut aamma iluaqutissinneqassammata. Nunaqarfanni amerlasuuni inuussutissaanngitsunik nutaanngitsunik nioqqutissaateqartoqarpoq, soorlu fladskærmit ukiorpassuarni pisarineqassanatik uninngasimasut. Tamatuma kinguneraa nioqqutissat pisoqalisut, KNI-mullu annaasaqaataasut kiisalu atuisartut naammaginninnginnerunerat. Taamaattumik pisarnertut amerlasuut illoqarfanni anginerusuni annertunermik neqeroorfiusuni unammillernikkullu akikinneruffiusuni pisiassat anginerusut tamakku pisiarisalereerpaat.

Ikinnerussuteqartut ammasarfiit nutaat sivikinnerusut ugguarineqarmata paasisinnaavaat, peqatigitilluguli tikkuassallugu, ammasarfiit annikinnerpaaffissaat pineqarmata, taamaattumillu najukkami kaaviiartitsineq pisariaqartitsinerlu apeqqutaatillugu ammasarfiit annikinnerpaaffissaannit siviunerusumik ammanissamut periarfissaqarluni. Taamaakkaluartoq pisiniat pisiniarusuppata niuertarfiit matoqqatissallugit niuernerlunneruvoq, tamannalu KNI-p soorunami ilisimavaa.

Kiisalu ikinnerussuteqartut tikkuassavaat kiffartuunneqarnissamik isumaqatigiisummi nutaami KNI pisiniarfiit siunnersuisoqatigiivini pilersitsinissamut pisussaaffilerneqarmat nuannaarutissaasoq, taamaalilluni innuttaasut nioqqutissat assigiinngisitaarnerannut sunniuteqartinneqassammata.

Ataatsimut isigalugu taamaalilluni ikinnerussuteqartut isumaqarput kiffartuunneqarnissamik isumaqatigiisut nutaaq nunap aningaasaqarnera ataqqillugu innuttaasut sunniuteqariartuaarnerunissaannut aalajangeeqataannissannullu alloriarnerusoq eqqortoq,

namminersorlunilu oqartussaanerup tunngavianut kissaatigineqartumut tulluurtuusoq. Taamaattumik ikinnerussuteqartut kiffartuunneqarnissamik isumaqatigiissummut missingiusiaq akuerisinnaavaat.

Siuliani allassimasut tunngavigalugit ulloq 14. december 2011-mi ataatsimiinnermi Aningaasaqarnermut Ataatsimiititaliami amerlanerussuteqartut aalajangerput Naalackersuisut inassuteqaataat itigartinneqassasut aammalu apeqqutigineqartut akineqarnissaat qinnutigineqassasoq.

Apeqqutinut Naalackersuisut allakkakut 23. december 2011-meersutigut akissutaat ataatsimiititaliamit tiguneqarput. Aningaasatigut maanna sinaakutissat iluanni kiffartuussinissamik isumaqatigiissutissatut siunnersuutigineqartoq malunnaatilimmik pitsannagortinneqarsinnaanngitsoq Naalackersuisut nalileraat allakkani allassimavoq.

Kiisalu ataatsimiititaliap suliamik sularinninnerani sassartinneqarnissaq Naalackersuisut allakkani qinnutigaat.

Ataatsimiititaliap ulloq 28. december 2011-mi ataatsimiinnerani isumaqatigiissutissatut missingiusiaq Naalackersuisup Jens B. Frederiksenip nassuiaatigaa. Naalackersuisup ilisimatitsissuteqarnera tunngavigalugu isumaqatigiissutigineqarpoq kiffartuussinissaq pillugu KNI-mut maanna isumaqatigiissutip ukiumi ataatsimi ingerlaannarnissaanut periarfissaqarnerisooq Naalackersuisup misissussagaa tamannalu pillugu ataatsimiititaliamut nalunaaruteqassasoq.

Aningaasaqarnermut Ataatsimiititaliap aalajangiinera

Maanna isumaqatigiissutaasup ingerlaannarsinnaanerata paasinarsinissaata tungaanut kiffartuussinissaq pillugu KNI-mut isumaqatigiissut **unitsikkallarneqarpoq**.

Aningaasaqarnermut Ataatsimiititaliaq
sinnerlugu

Andreas Uldum
Siulittaasoq